

四
六
叢
話

四六叢話卷三十一

烏程 孫梅 輯

作家四

三國六朝諸家

案古文至魏氏而始變變而爲矜才侈博六朝由此增華然而質韻猶存沈刻峭拔是其所長無襲積甌匄之迹也如鍾索初變隸法尚畱古意述儷者於此尋源溯古者於此辨異

魏文帝

諱丕字子桓武帝太子也中平四年冬生于譙建安十六年爲五官中郎將太祖崩嗣位爲丞相魏王延

康元年丙午漢帝使張音奉璽綬禪位庚午卽祚改
延康爲黃初七年五月丁巳崩于嘉福殿年四十初
帝好文學以著述爲務自所勒成垂百篇又使諸儒
撰集經傳隨類相從凡千餘篇號曰皇覽

魏志

陳思王曹植

字子建年十歲餘善屬文時鄴銅爵臺成太祖使爲
賦植援筆立成黃初三年爲鄴城王太和三年徙封
東阿六年封陳王薨年四十一所著賦頌詩銘雜論
凡百餘篇

魏志

欽定四庫全書簡明目錄曹子建集十卷凡賦四十四篇

詩七十四篇雜文九十三篇目錄後有嘉定六年癸酉字蓋卽文獻通考所載本也其中善哉行誤收古詞七哀詩不收本詞而收晉樂所奏玉臺新咏所載棄婦篇藝文類聚所載回文鏡銘坦齋通篇所載王宋詩均未收入亦不免有所舛漏

曹植集一卷植太祖子諡曰思集僅二百篇

郡齋讀

書志

諸葛亮

字孔明瑯琊陽都人先主卽位策亮爲丞相建興元年封武鄉侯十二年八月卒于軍年五十四

漢晉春秋曰亮

卒于郭遺命葬漢中定軍山諡忠武

蜀志

案武侯文沿體東漢真而婉邃而暢然如上漢中王表正議等篇抑揚壯麗實開排偶門庭矣特氣尤沈厚耳

曹問

字元首少帝族祖爲宏農太守

魏晉春秋

繁欽

字休伯以文才機辯少得名于汝潁長於書記又善爲詩賦爲丞相主簿建安二十三年卒

典略

楊修

字德祖太尉彪子建安中舉孝廉除郎中丞相請署
倉曹屬主簿臨菑侯植以才捷愛幸修數與修書至
二十四年秋公以修前後漏泄言教收殺之臨死謂
故人曰我固自以死之晚也其意以爲坐曹植也典
略

應璩

字休璉博學好屬文明帝世歷官散騎常侍曹爽秉
政多違法度璩爲詩以諷焉嘉平四年卒文章敘錄

應瑒

字德璉太祖辟爲丞相掾屬轉平原侯庶子後爲五

官將文學著文賦數十篇

魏志

吳質

字季重以才學通博爲五官將及諸侯所禮愛質亦善處其兄弟之間若前世樓君卿之游五侯矣出爲朝歌長後遷元城令

魏略

陳琳

字孔璋前爲何進主簿進欲誅宦官琳諫不納避難冀州袁紹使典文章袁敗歸太祖爲司空軍謀祭酒管記室徙門下督

魏志

陳孔璋集十卷魏丞相軍謀掾廣陵陳琳撰案魏志

文帝爲五官中郎將及平原侯植皆好文學山陽王
粲仲宣北海徐幹偉長廣陵陳琳孔璋陳留阮瑀元
瑜汝南應瑒德璉東平劉楨公幹竝見友善自邯鄲
淳繁欽路粹丁廙楊修荀綽等亦有文采而不在此
七人之列世所謂建安七子者也但自王粲而下纔
六人意子建亦在其間耶而文帝典論則又以孔融
居其首并粲琳等謂之七子植不與焉今諸家詩文
散見於文選及諸類書其以集傳者仲宣子建孔璋
三人而已余家亦未有仲宣集

直齋書錄解題

阮瑀

字元瑜少受學蔡邕建安中都護曹洪欲使掌書記
瑀終不爲屈太祖以瑀爲司空軍謀祭酒管記室十
七年卒

魏志

案籍瑀之子也

陸景

字士仁以尚公主拜騎都尉封毗陵侯拜偏將軍中
夏督澡身好學著書數十篇

魏志

陸景集一卷亡

隋志

案景吳人遜之孫抗之次子抗卒與兄晏弟元機雲
分領抗兵後爲王濬軍所殺

陸機

見賦家

陸雲

見賦家

薛綜

字敬文沛郡竹邑人爲五官中郎除合浦交趾太守
權敕綜祝祖不得用常文綜承詔卒造文義信辭粲
爛權曰復爲兩頭使滿三月綜復再祝辭令皆新衆
咸稱善赤烏五年爲太子少傅六年春卒凡所著詩
賦難論數萬言名曰私載

吳志

袁宏

見賦家

向秀

見賦家

張華

見賦家

潘岳

見賦家

稽康

見賦家

索靖

字幼安敦煌人該博經史兼通內緯與衛瓘俱以草書知名有先識遠量知天下將亂指洛陽宮門銅駝曰會見汝在荆棘中耳太安末拜遊擊將軍與賊戰大破之靖亦被傷卒贈司空諡莊靖

晉書

張載

字孟陽安平人博學有文章太康初至蜀省父經劔閣以蜀人恃險好亂因著銘以作誠又爲濛汜賦傅元見而歎之起家佐著作郎出補肥鄉令長沙王又請爲記室督拜中書侍郎見世方亂無復進仕意遂

稱疾篤告歸

晉書

張協

字景陽守道不競以屬詠自娛擬諸文士作七命世以爲工永嘉初徵爲黃門侍郎託疾不就時人爲載協亢曰三張亢述歷贊一篇見律歷志

晉書

案亢字季陽才藻不逮二昆

皇甫謐

字士安定朝那人年二十不好學游蕩無度叔母任氏曰修身篤學自汝得之於我何有對之流涕乃感激就鄉人席坦受書躬自稼穡帶經而農遂博綜典

籍舉孝廉不行武帝下詔敦逼竟不仕卒年六十八
所著詩賦誄頌論難甚多又撰帝王世紀年歷高士
逸士列女等傳元晏春秋並重於世

晉書

趙至

字景真代郡人寓居洛陽緱氏令初到官至年十三
與母同觀母曰爾後能如此不至感母言詣師受業
聞父耕叱牛聲投書而泣曰我未能榮養使老父不
免勤苦年十四詣洛陽遇嵇康請問姓名康曰年少
何以問邪曰觀君風氣非常所以問耳年十六游鄴
復與康相遇隨康還山陽改名浚字允元遼西舉郡

計吏到洛與父相遇時母已亡父欲令其宦立弗之
告仍戒以不歸太康中以良吏赴洛方知母亡號憤
慟哭歐血而卒時年三十七

晉書

劉伶

字伯倫沛國人容貌甚陋放情肆志未嘗措意文翰
著酒德頌一篇嘗爲建威參軍泰始初對策時輩皆
以高第得調伶獨以無用罷竟以壽終

晉書

劉琨

字越石中山魏昌人二十六爲司隸從事時石崇河
南金谷澗中有別廬冠絕時輩琨預其間文詠頗爲

當時所許以勲封廣武侯永嘉元年爲并州刺史建武元年與匹磾期討石勒匹磾雅重琨初無害琨志其中弟叔軍有智謀謂匹磾曰若有奉琨以起吾族盡矣遂留琨會王敦密使匹磾殺琨匹磾懼衆反稱有詔收琨遂縊之時年四十八

晉書

劉司空集十卷前五卷差全可觀後五卷闕誤或一卷數行或斷續不屬殆類鈔節者末卷劉府君誄尤多譌未有別本可以是正

山齋書錄解題

盧謚

字子諒善屬文選尚武帝女滎陽公主拜駙馬都尉

劉琨爲司空以謔爲主簿匹磾旣害琨尋亦敗喪時南路阻絕段末波在遼西往投之元帝初末波通使江左謔因使抗表理琨文旨甚切卽加弔祭累徵謔爲末波所留不得南渡流離世故且二十載冉閔誅石氏謔隨閔軍遇害時年六十七

晉書

案越石寥寥數篇才氣傑然足蓋魏晉其勸進表荅盧謔詩序豪宕感激從肺腑流出無意於文而文斯至不獨五言寄託非常也孝穆子山得其一斑遂以名世抽青妃白者豈常夢見子諒亦自斐然視越石則邾莒矣

石崇

字季倫生于青州故小名齊奴穎悟有才氣而任俠無行檢在荊州劫遠使商客致富不貲有妓曰綠珠美而豔善吹笛孫秀求之不得遂矯詔收崇綠珠自投樓下而死崇被害時年五十二

晉書

干寶

字令升新蔡人少勤學博覽撰集古今神祇靈異人物變化名爲搜神記以示劉惔惔曰卿可謂鬼之董狐又爲春秋左氏義外傳注周易周官凡數十篇及雜文集皆行于世

晉書

庾亮

字元規明穆皇后之兄以誅王敦功封永昌縣公咸康六年薨年五十二贈太尉謚文康

晉書

桓溫

字元子豪爽有風槩姿貌甚偉面有七星選尚南康長公主拜駙馬都尉累遷大司馬薨時年六十二

晉書

劉穆之

字道和小字道人東莞莒人世居京口宋武帝尅京城從何無忌求府主簿帝曰我須一軍吏甚急穆之

曰無見踰者帝曰卿能自屈吾事濟矣卽于坐受署
穆之與朱齡石並便尺牘嘗于武帝坐與齡石並答
書自旦至日中穆之得百函齡石得八十函而穆之
應對無廢性奢豪食必方丈旦輒爲十人饌未嘗獨
餐義熙十三年卒追贈開府儀同三司

南史

虞通之

餘姚人善言易至步兵校尉

南史

檀珪

字伯玉位沅南令元徽中安成郡丞

南史

案珪道濟之孫

周朗

字義和汝南安成人爲江夏王義恭參軍及義恭出鎮府主簿羊希從行與朗書戲之勸令獻奇進策朗報書援引古義辭意倜儻孝武卽位上書陳述多自矜誇忤旨去職後以居喪無禮鎖付邊郡傳送寧州於道殺之

南史

周禹

字彥倫元徽中爲剡令有恩惠齊高帝輔政爲齊殿中郎建元初爲長沙王參軍山陰令轉國子博士兼著作惠太子問禹菜食何味最勝禹曰春初早韭秋

未晚菘著四聲切韻行於時

南史

袁昂

字千里雍州刺史顓之子容質修偉以父亡不以理
終身不聽音樂本名千里齊永明中武帝謂曰昂昂
千里之駒在卿有之改卿名爲昂卽字千里大通中
位司空大同六年薨諡穆正有集二十卷

南史

任昉

字彥昇樂安博昌人父遙齊中散大夫遙妻裴氏夢
五色采旗蓋四角懸鈴自天而墜一鈴落懷中心悸
因而有娠占曰必生才子及生昉幼而聰明八歲能

屬文製月儀辭甚美小名阿堆初舉兗州秀才拜太
學博士梁武帝以爲記室參軍專主文翰尋轉祕書
監出爲新安太守諡敬子

南史

陸倕

字佐公少勤學善屬文所讀一徧必誦于口嘗借人
漢書失五行志四卷乃暗寫還之略無遺脫十七舉
本州秀才與任昉友爲感知已賦以贈昉梁武帝愛
倕才敕撰新漏刻銘文甚美累遷太常卿

南史

劉虬

字靈預一字德明南陽涅陽人少抗節好學須得祿

便隱宋泰始中仕至晉平王驃騎記室罷永明三年

徵爲通直郎不就卒年五十八

南史

齊徵士劉虬集二十四卷亡

隋志

張充

字延符少好逸遊緒告歸至吳逢充獵右臂鴈左牽

狗緒曰一身兩役無乃勞乎充跪曰充聞三十而立

今充二十九矣請至來歲及明年便修改多所該通

歷尚書殿中郎天監初歷太常卿吏部尚書卒于吳

郡諡曰穆

南史

案充吳郡吳人緒之子也

蕭子良

字雲英武帝第二子少有清尚

一作尚

禮才好士天下

才學皆游集焉善立勝事夏月客至爲設瓜飲及甘果著之文教士子文章及朝貴辭翰皆發教撰錄隆昌元年疾篤曰門外應有異遣人視見淮中魚無算皆浮出水上向城門尋薨年三十五所著內外文筆數十卷

南史

梁武帝

諱衍字叔達小字練兒南蘭陵中都里人姓蕭氏生有異光舌文八字有文在右手曰武及長博學多通

天監元年卽位王侯朝臣皆奉表質疑帝皆爲解釋自在田及登寶位躬制贊序詔誥銘誄箴頌牋奏諸文字又百二十卷六藝備閑棊登逸品

南史

簡文帝

諱綱字世纘小字六通武帝第三子昭明太子母弟幼聰睿六歲能屬文辭藻豔發時號宮體所著昭明太子傳五卷文集一百卷行於世

南史

元帝

諱繹字世誠小字七符武帝第七子天監十三年封湘東王帝聰悟俊朗博極羣書工書善畫自圖宣尼

像爲之贊而書之時人謂之三絕著文集五十卷

南

蕭綸

字世調小字六眞武帝第六子少聰穎博學善屬文
尤工尺牘後預餞衡州刺史元慶和於坐賦詩十二
韻大爲武帝賞曰汝人才如此何慮無聲旬日閒拜

郢州刺史

南史

案金石略陶宏景碑招隱寺刹下銘皆蕭綸八分書

王僧孺

字僧孺東海剡人幼聰慧七歲能讀十萬言及長篤

愛墳籍家貧常傭書以養母寫畢諷誦亦了建武初
除儀曹郎遷書侍御史出爲錢塘令天監初爲南海
太守徵還遷尚書左丞兼御史中丞普通二年卒文
集三十卷

南史

王曇首

幼有素尚兄弟分財曇首惟取圖書宋武帝大會戲
馬臺賦詩曇首文先成卒時年三十七贈光祿大夫
諡曰文子僧綽嗣

南史

王儉

字仲寶生而僧綽遇害爲叔父僧虔所養幼篤學賓

客或相稱美僧虔曰我不患此兒無名政恐名太甚耳宋明帝選尚陽羨公主齊高帝踐祚建元元年封南昌縣公薨年四十八諡文憲

南史

孔稚珪

字德璋會稽山陰人

齊書

集十卷稚珪道隆孫爲東南冠族少知名有文彩辭章清拔獨冠當世舉秀才爲安成王法曹參軍齊高帝時補記室參軍終于都官尚書散騎常侍太子詹事追贈金紫光祿大夫諡簡子集有序云所爲文章雖行於世竟未撰集今摭其遺逸分爲十卷然莫知

其爲誰序也

郡齋讀書志

孔德璋集十卷

案文獻通考作一卷

北山移文其所作也

直齋

書錄解題

王融

字元長少警慧母臨川太守謝惠宣女教融書學博涉有文才從叔儉謂人曰此兒至四十名位自然及祖舉秀才弱年求自試遷祕書丞永明九年芳林園禊宴使融爲出水詩序當時稱之爲中書郎欲矯詔立子良不遂于獄賜死年二十七

南史

蕭大園

簡文帝第二十子大寶元年封後入周仕隋位內史

侍郎

南史

張纘

字伯緒梁初尚武帝女富陽公主起家祕書郎好學
兄緬有書萬餘卷晝夜披讀殆不輟手太清二年徙
領軍俄改雍州刺史岳陽王譽襲江陵逼使爲檄固
辭以疾及軍敗害之元帝承制贈開府儀同三司諡
簡憲文集二十卷

南史

范雲

字彥龍南鄉舞陰人天監元年遷散騎常侍吏部尚

書以佐命功封霄城縣侯卒年五十三諡曰文集三

十卷

南史

虞羲

字士光餘姚人盛有才藻

南史

字子陽會稽人七歲能屬文始安王引爲侍中兼記

室參軍天監中卒

本集序

何允

字子季折節好學居若邪雲門山寺初允二兄求點
並棲遁求先卒至是允又隱世號點爲大山允爲小

山卒年八十六

南史

王少

字簡棲瑯琊臨沂人有學業爲輔國錄事參軍天監

中卒

姓字英賢錄

案水元虛海賦王簡棲頭陀寺碑畢生所作惟傳一篇而榮名不朽列於作者所謂威鳳一羽驗其五德也小夫豎儒誇多鬪捷若景文一官一集陳陳相因彼何爲者

王筠

字元禮一字德柔年十六爲芍藥辭甚美歷祕書監太府卿度支尚書簡文卽位爲太子詹事遇亂寓居

蕭子雲宅後忽有盜攻懼墜井卒年六十九自序云
余少好鈔書老而彌篤躬自鈔錄大小百餘卷自撰
其文章以一官爲一集凡一百卷

南史

徐勉

字修仁東海郟人年六歲屬霖雨家人祈霽率爾爲
文見稱耆宿爲尚書僕射加中書令謚簡肅所著前

後集五十卷

南史

陶宏景

字通明丹陽秣陵人讀書萬餘卷一事不知以爲深
恥爲諸王侍讀永明十年脫朝服卦神武門上表辭

祿許之止于句容之句曲山自號華陽陶隱居人間
書札卽以隱居代名梁大同二年卒年八十五諡貞

白先生

南史

鍾嶸

字仲偉潁川長社人晉侍中雅七世孫與兄岵弟嶼
並好學有思理梁天監初衡陽王元簡出守會稽引
爲寧朔記室時居士何允築室若邪山山發洪水漂
拔樹石此室獨存嶸作瑞室頌辭甚典麗遷西中郎
晉安王記室齊永明中卒官

南史

欽定四庫全書簡明目錄詩品三卷梁鍾嶸撰取漢魏至

梁能詩者一百三人分爲三品每品各冠以小序每人又系以論斷惟所爲某人詩源出某人者頗爲武斷至其妙解文理不減劉勰王士禎嘗病其次第高下多所違失然古人篇什今已百不存一未可據殘剩之餘定當日評隲之確否也

詩品三卷嶸嘗求譽于沈約約拒之及約卒嶸評云觀休文衆製五言最優齊永明中相王愛文王元長等皆宗附約于時謝朓未遒江淹才盡范雲名級又微故稱獨步故當辭宏于謝意淺于江蓋追宿憾以此報約也

郡齋讀書志

案嶸詩品導源騷雅詮敘衆家自非好學心知直追
作者何能品衡商榷晶若龜鏡浴及唐宋遂開詩話
之宗雅道不墜賴有斯文

顏之推

見賦家

顏氏家訓七卷北齊黃門侍郎瑯琊顏之推撰古今

家訓以此爲祖

直齋書錄解題

案四六長于敷陳短于議論蓋比物連類馳騁上下
譬之蟻封盤馬解不躡矣乃六朝之文無不以駢儷
行之者而顏氏家訓九擅議論之長街談巷說鄙情

瑣語一入組織皆工妙可誦習駢儷者予以探賸觀
瀾非徒成一家言也

何遜

字仲言梁天監中兼尚書水部郎王僧孺集其文爲
八卷遜文章與劉孝綽並見重於時時謂之何劉

史

何仲言集三卷

案文獻通
攷作二卷

直齋書錄解題

案遜東海郟人承天曾孫

吳均

字叔庠吳興故郟人梁天監初柳惲爲吳興召補主

簿均文體清拔有古氣好事者或效之謂爲吳均體
待詔著作累遷奉朝請文集二十卷

南史

吳均集三卷顏之推譏均集中有破鏡賦今亦亡之

郡齋讀書志

劉勰

字彥和東莞莒人梁天監中兼東宮通事舍人深被
昭明太子愛接撰文心雕龍五十篇論古今文體欲
取定于沈約無由自達乃負書候約于車前狀若貨
驚者約取讀大重之謂深得文理常陳諸几案勰爲
文長于佛理敕于定林寺撰經證功畢遂求出家改

名慧地

南史

案士衡文賦一篇引而不發旨趣躍如彥和則探幽索隱窮形盡狀五十篇之內百代之精華備矣其時昭明太子纂輯文選爲詞宗標準彥和此書實總括大凡妙抉其心二書宜相輔而行者也自陳隋下訖五代五百年間作者莫不根柢于此嗚呼盛矣

伏挺

字士操博學有才思樂安任昉常曰此子日下無雙天監初除中軍參軍事文集二十卷

南史

周宏讓

性簡素博學多通陳天嘉初以白衣領太常卿光祿

大夫

南史

案宏讓汝南武城人

劉孝綽

本名冉七歲舅王融深賞異之曰天下文章若無我
當歸阿士阿士孝綽小字也天監初起家著作佐郎
後爲祕書監卒年五十九辭藻爲後進所宗時重其
文每作一篇朝成暮徧好事者咸傳誦寫聞河朔學
苑柱壁莫不題之其三妹一適琅邪王叔英一適吳
郡張曠一適東海徐悱並有才學悱妻文允清拔所

謂劉三娘也

南史

梁廷尉卿劉孝綽集十四卷

隋志

劉潛

字孝儀幼孤與諸兄弟相勗以學竝工屬文孝綽嘗云三筆六詩三卽孝儀六謂孝威也舉秀才累遷尚書殿中郎敕令製雍州平等寺金像碑文甚宏麗文集二十卷行于世

南史

梁都官尚書劉孝儀集二十卷太子庶子劉孝威集

十卷

隋志

顧野王

字希馮吳郡吳人九歲能屬文嘗制日賦領軍朱异
見而奇之十二歲隨父之建安撰建安地記二篇宣
城王爲揚州刺史野王及王褒並爲賓客王甚愛其
才又善丹青王令畫古賢命王褒書贊時稱二絕陳
天嘉中爲黃門侍郎光祿卿知五禮事有文集二十
卷

南史

江總

字總持幼聰敏及長篤學有文辭後主卽位歷吏部
尚書僕射尚書令入隋拜上開府有文集三十卷

南史

案總濟陽考城人

庾肩吾

字慎之八歲能賦詩初爲晉安王常侍被命與劉孝威等十人鈔撰衆籍號高齋學士歷江州刺史封武康縣侯贈中書令

南史

朱瑒

王琳故吏晉王好文雅招引才學之士以充學士瑒

與焉

隋書

沈不害

字孝和吳興武康人通經術善屬文雖博綜經典而

家無卷軸製文操筆立成曾無尋檢文集十四卷

隋

書

李昶

小名那幼解屬文有聲洛下十數歲爲明堂賦才制
可觀周保定初爲納言詔冊文筆皆昶所作以父在
江南身寓關右自少及終不飲酒聽樂

北史

尹義尚

案李那尹義尚二書並附見徐孝穆集辭旨抑揚才
情辨博豈孝穆實潤飾之歟不然何朱藍之不遠也
觀尹書當于梁時與孝穆同使魏徐旣歸而尹獨被

留者然徐在西魏與楊僕射書云謝常侍今年五十有一吾今年四十有四介已知命賓又杖鄉又北史魏收傳魏帝使兼主客郎接梁使謝璉徐陵則與陵同使北者璉也非義尚也豈義尚與陵先後聘魏乎未可知也

楊銜之

欽定四庫全書簡明目錄洛陽伽藍記五卷後魏楊銜之撰

案楊或作羊未詳孰是

魏自太和以後洛陽佛刹甲天下永

熙亂後銜之行役故都感懷興廢因摭拾舊聞追敘故迹錄成是書以城內及四門之外分敘五篇文詞

四庫全書卷二十一
秀逸且多附軼事足資考證

案洛陽伽藍記鋪敘宏麗點綴清妍其景福之匹儔
靈光之支裔歟

邢邵

字子才小字吉十歲能屬文雅有才思遷著作佐郎
爲領軍元乂所禮乂新除遷尚書令神雋與陳郡袁
翻在席乂令邵作謝表須臾便就以示諸賓神雋曰
邢郎此表足使袁公變色詞致宏遠獨步當時與濟
陰溫子昇爲文士之冠世論謂之溫邢集三十卷

北
史

溫子昇

字鵬舉自云太原人晉大將軍嶠之後也博覽百家
文章清婉爲廣陽王深賤客在馬坊教諸奴子書作
侯山祠堂碑文深由是稍知之齊文襄引爲大將軍
諮議及元僅劉思荀濟等作亂文襄疑子昇知其謀
方使之作神武碑文旣成乃餓諸晉陽獄食弊襦而
死宋游道集其文筆爲三十五卷

北史

酈道元

字善長襲爵永寧侯雍州刺史蕭寶夤反狀稍露侍
中城陽王徽素忌道元因諷朝廷遣爲關右大使寶

蚤遣行臺郎中郭子帙圍道元於陰盤驛亭道元與其弟道闕二子俱被害道元好學歷覽奇書撰注水經四十卷本志十三篇又爲七聘及諸文皆行於世北史

欽定四庫全書簡明目錄水經注四十卷水經舊題漢桑欽撰然證以書中地理實三國時人其注則後魏酈道元作自明以來傳刻舛誤經注混淆今以永樂大典所載舊本重爲校正補其佚脫者二千一百一十八字刪其妄補者一千四百四十八字正其臆改者三千七百一十五字雖宋本原佚之五卷不可復補

較諸明刻亦可謂還其舊觀矣

案天地間山水林麓奇偉秀麗之致賴文人之筆以
陶寫之若陸雲蒼車茂安書鮑照大雷岸與妹書等
篇託興涉筆都成絕構蓋皆會景造語不假雕琢者
也至酈善長始以淹雅之才發摠文筆勒爲水經注
四十卷訂以志乘緯以掌故刻畫標致奇幽詭勝搜
剔無遺後來作者罕復能繼惟柳子永州八記筆力
高絕萬古雲霄一羽毛非諸家所敢望爾

徐陵

字孝穆母臧氏夢五色雲化爲鳳集左肩上已而誕

陵釋寶誌摩其頂曰天上石麒麟也太清二年使魏人授館宴賓是日甚熱主客魏收嘲陵曰今日之熱當由徐常侍來陵曰昔王肅至此爲魏始制禮儀今我來聘使卿復知寒暑收大慙自陳創業文檄軍書及禪授詔策皆陵所製爲一代文宗亦不以矜物未嘗詆訶作者其于後進接引無倦文宣之時國家有大手筆必命陵草之其文頗變舊體緝裁巧密多有新意

南史

徐陵集三十卷

隋志

欽定四庫全書簡明目錄徐孝穆集箋註六卷陳徐陵撰

國朝吳兆宜箋註較庾信集箋註稍略似乎未成之本
然亦有足備參攷者

庾信

見賦家

沈炯

字初明吳興武康人王僧辯素聞其名軍出購得之
自是羽檄軍書皆出于炯及簡文遇害四方岳牧上
表勸進僧辯令炯製表當時莫有逮者魏剋荊州甚
見禮遇以母在東恆思歸國恐以文才被留閉門却
掃無所交接時有文章隨卽毀棄不令流布嘗獨行

經漢武通天臺爲表奏之陳已思鄉之意其夜夢有
宮禁之所兵衛甚嚴炯便以情事陳訴聞有人言甚
不惜放卿還幾時可至少日便與王克等並獲東歸
以疾卒于吳中謚恭集二十卷 南史

陳侍中沈炯前集七卷後集十三卷 隋志

盧思道

字子行聰爽俊辨通脫不羈年十六中山劉松爲人
作碑銘以示思道思道讀之多所不解乃感激讀書
師事河間邢子才後復爲示松松不能甚解乃喟然
歎曰學之有益豈徒然哉因就魏收借異書數年間

才學兼著同郡祖英伯及從兄昌期等舉兵作亂思道預馮宇文神舉討平之思道罪當斬神舉引出令作露布援筆立成神舉嘉而宥之除掌教上士隋文帝爲丞相遷武陽太守位下不得志爲孤鴻賦以寄其情又著勞生論指切當世卒于京師集二十卷北史

范陽太守盧思道集三十卷

隋志

薛道衡

字元卿六歲而孤專精好學年十歲講左傳見子產相鄭之功作國僑贊頗有詞致見者奇之其後才名

益著每搆文隱坐空齋蹋壁而卧聞戶外有人便怒

其沈思如此集七十卷

北史

司隸大夫薛道衡集三十卷

隋志

許善心

字務本高陽北新城人十五解屬文爲牋上父友徐陵陵大奇之謂人曰此神童也有神雀降于含章閣上召百官賜宴告以此瑞善心立請紙筆製神雀頌上甚悅曰文不加點筆不停毫常聞此言今見其事賜物二百段十七年除祕書丞時祕藏圖籍多淆亂善心效阮孝緒七錄更制七林各總敘冠于篇首又

于部錄之下明作者之意區分類例焉

北史

案許文節通才敏手足爲徐庾後勁著作必多乃考本傳及經籍志竟無別集僅于傳內所載二篇略見一斑豈遭喪亂而散佚耶文之傳不傳洵有數歟

四六叢話卷三十一 畢

四六叢話卷三十一

烏程 孫梅 輯

作家五

唐四六諸家

魏徵

字元成魏州曲城人贈司空相州都督諡曰文貞

唐

書

案鄭公初以文筆爲李密所知親爲密草檄及密誌
銘二作體格清美蔚乎徐庾之上其不以文士名爲
勳業掩也

溫大雅

字彥宏并州祁人性至孝與弟彥博大有皆知名薛道衡見之歎曰三人者卿相才也秦王表鎮洛陽王卽位封黎國公卒諡曰孝

唐書

唐創業起居注五卷

案唐書藝文志作三卷

所載自起義至受

禪凡三百五十七日其述神堯不受九錫反復之語

甚詳

直齋書錄解題

案四六之文議論難矣而敘事尤難顏氏家訓鄭氏水經注援據徵引則有之矣敘事猶未也其惟創業起居注乎以編年之體爲鴻博之辭不惟對屬之能兼有三長之目學者與陸宣公奏議參觀之知熟於

此道者固無施不可

王績

字無功絳州龍門人性簡放無妻子結廬北渚有奴婢數人種黍春秋釀酒養鳧雁蒔藥草自供武德初待詔門下省故事官給酒日三升或問待詔何樂邪荅曰良醞可戀耳侍中陳叔達聞之曰給一斗時稱斗酒學士貞觀初棄官去所居東南有盤石立杜康祠祭之刺史崔喜悅之請相見荅曰奈何坐召嚴君平耶卒不詣杜之松故人也爲刺史請績講禮荅曰吾不能揖讓邦軍門談糟粕棄醇醪也之松歲時贈

以酒脯

唐書

欽定四庫全書簡目目錄東臯子集三卷續爲王通之弟而天性真率不隨通聚徒講學獻策于進詩文皆疏野有別致其詩惟野望一篇最傳然如石竹詠贈薛收詩皆風骨迥上古意六首亦陳張感遇之先導集爲呂才所編此本卷數與才序合而才所稱龍門憶禹賦集乃不載似未必舊本矣

王績東臯子五卷隋大業中舉孝悌廉潔授六合丞棄官耕東臯自號東臯子唐書以爲隱逸集有呂才序稱其幼岐嶷年十五謁楊素占對英辨一坐盡傾

以爲神仙童子薛道衡見其登龍門憶禹賦歎曰今之庾信也且載其卜筮之驗數事云

郡齋讀書志

東臯子五卷唐大樂丞太原王績無功撰績支中子王通仲淹之弟也仕隋爲正字嗜酒簡放不樂仕進晚以大樂吏焦革善釀求爲其丞不問流品亦阮嗣宗步兵之意也自號東臯子其友呂才鳩訪遺文編成五卷爲之序

直齋書錄解題

案東臯子身際隆平以酒自放意者以兄僭經擬聖恐其獲議於世故以嗜酒真率分謗混俗歟之松相招講禮意欲以名教樂地諷止之也而績不從故二

書往復俱有言外之意

王勃

字子安絳州龍門人六歲善文詞九歲得顏師古注漢書讀之作指瑕以擿其失麟德初對策高第年未及冠授朝散郎父福時左遷交趾令勃往省渡海溺水焮而卒年二十九勃祖通隋末居白牛溪教授門人甚衆勃兄勳弟助皆第進士

唐書

欽定四庫全書簡明目錄王子安集十六卷勃集久佚初唐十二家集中僅載其詩賦一卷故皇甫沔作楊炯集序稱王詩賦之餘未睹他製此本乃明崇禎中張

燮所編皆從諸書採輯而成較宋本僅少四卷蓋勃文章鉅麗爲四傑之冠諸家總集所錄特多也

王勃集二十卷勃通之孫麟德初劉祥道薦其材對策高等授朝散郎沛王召署府修撰以戲爲諸王作鬪雞檄高宗怒斥出府父爲交趾令勃往省溺海卒勃屬文初不精思先磨墨數升酌飲引被覆面臥及寤援筆成篇不易一字時人謂之腹藁有劉元濟序

郡齋讀書志

楊炯

華陰人舉神童授校書郎永隆二年皇太子已釋奠

表充崇文館學士出爲梓州參軍遷盈川令卒官下

中宗時贈著作郎

唐書

欽定四庫全書簡明目錄盈川集十卷附錄一卷亦明萬
歷中龍游童佩所輯錄也凡賦八首詩三十四首雜
文三十九首而以贈荅評論之作別爲附錄其彭城
公夫人爾朱氏墓誌伯母李氏墓誌誤編庾信集中
此本收爾朱氏一篇而李氏一篇仍失載則搜採尙
有遺也

炯自謂吾愧在盧前恥居王後張說曰盈川文如懸
河酌之不竭恥王後信然愧盧前謙也集本三十卷

今多亡逸

郡齋讀書志

盧照鄰

字昇之洛陽人授新都尉病去官自以當高宗時尙
吏已獨儒武后尙法已獨黃老后封嵩山屢聘賢士
已已廢著五悲文以自明

唐書

欽定四庫全書簡明目錄盧昇之集七卷原本十卷此本
僅存七卷其窮魚賦序稱常思報德故冠之篇首今
此賦不在篇首知亦出重編非其舊第矣

盧照隣幽憂子集十卷昇之病去官隱具茨山下手
足孿廢疾久訣親戚自沈潁水后封嵩山聘賢士已

已廢著五悲文今在集中嘗自號幽憂子

郡齋讀書

志

盧照隣集十卷唐新都尉洛陽盧照鄰撰以久病自

沈穎水

直齋書錄解題

駱賓王

義烏人七歲能賦詩除臨海丞鞅鞅不得志棄官去

徐敬業亂署賓王府屬爲敬業傳檄天下敬業敗賓

王亡命不知所之

唐書

欽定四庫全書簡明目錄駱丞集四卷明顏文撰註賓王

討武后敗死頗爲唐人所憐故造有靈隱寺爲僧之

說卽中宗亦不甚以爲非故詔求其文使郗雲卿編
次然雲卿所編百餘篇今已久佚此本蓋後人所重
輯顏文撰註頗爲彘陋以原刻所有而姑存之

駱賓王集十卷賓王後爲敬業傳檄天下罪狀武后
所謂一抔之土未乾六尺之孤安在者也其首卷有
魯國郗雲卿序言賓王光宅中廣陵亂伏誅莫有收
拾其文者後有勅搜訪雲卿撰焉又有蜀本卷數亦
同而次序先後皆異序文視前本加詳而云廣陵起
義不捷因致遁逃文集散失中宗朝詔令搜訪案本
傳賓王亡命不知所之與蜀本序合

直齋書錄解題

李嶠

字巨山趙州贊皇人封趙國公以特進同中書門下
三品睿宗立罷政事元宗嗣位貶滁州別駕卒年七
十嶠富才思有所屬綴人多傳諷其仕前與王勃楊
炯接踪與崔融蘇味道齊名晚諸人沒而爲文章宿
老一時學者取法焉

唐書

集本六十卷未見今所錄一百二十詠而已

郡齋讀

書志

崔融

字安成齊州全節人擢八科高第補宮門丞崇文館

學士貶袁州刺史召授國子司業封清河縣子融爲
文華婉當時未有輩者謨武后哀冊最高麗絕筆而
死時謂思苦神竭云諡曰文

唐書

岑文本

字景仁鄧州棘陽人祖善方後梁吏部尙書更家金
陵父之象仕隋爲邯鄲令坐爲人訟不得申文本年
十四詣司隸理寃辯對哀暢無所訕衆屬目命爲蓮
花賦文成合臺嗟賞遂得直

唐書

袁朗

雍州長安人在陳爲秘書郎江總九器之陳後主聞

其才詔爲月賦一篇灑然無畱思後主曰謝莊不得
獨美於前矣 唐書

謝偃

衛州衛人貞觀初應詔對策高第太宗詔求直言偃
上書陳得失帝稱善引爲宏文館直學士遷魏王府
功曹嘗爲塵影賦二篇帝美其文召見欲偃作賦先
爲序一篇頗言天下乂安功德茂盛意投偃使賦偃
緣帝指名篇曰述聖帝悅賜帛數十初帝卽位直中
書省張蘊古上大寶箴諷帝以民畏而未懷其辭挺
切擢大理丞偃獻惟皇誠德賦其序大略言治忘亂

安忘危逸忘勞得忘失四者人主莫不然夏桀以瑤
臺爲麗而不悟南巢之禍殷辛以象箸爲華而不知
牧野之敗是以聖人處宮室則思前王所以亡朝萬
國則思已所以尊巡府庫則思金所以得視功臣則
思其輔佐之始見名將則思其用力之初如此則人
無易心天下何患乎不化哉且行之堯舜暮失之桀
紂豈異人哉其賦蓋規帝成功而自處至難云時李
百藥工詩而偃善賦時人稱李詩謝賦

唐書

張說

字道濟或字說之其先自范陽徙河南更爲洛陽人

元宗召爲中書令封燕國公諡文貞

唐書

欽定四庫全書簡明目錄張燕公集二十五卷唐張說撰其集唐志作三十卷宋以來諸家著錄則皆二十五卷與今本同考文苑英華及唐文粹所載詩文此集未收者尙六十一篇蓋撰錄二書之時其五卷尙未佚也今竝依類補入使成完本而二十五卷之數則仍其舊焉

說爲文精壯長於碑志朝廷大述作出其手常典集賢圖書之任閒爲天平軍大使及致仕一歲皆卽軍中於家論撰國史

郡齋讀書志

張燕公集三十卷與蘇頌號燕許大手筆二人名相
而以文擅天下盛矣哉

直齋書錄解題

案燕公筆力沈雄直追東漢非獨魏晉而下無堪相
匹卽合唐宋諸家自柳州而外未有能廁其壘者

陳子昂

字伯玉梓州射洪人十八未知書以富家子尙氣決
弋博自如他日入鄉校感悔卽痛修飾文明初舉進
士擢麟臺正字擢右拾遺徙署軍曹聖歷初以父老
表解官歸侍死年四十三

唐書

欽定四庫全書簡明目錄陳拾遺集十卷子昂始變文格

其詩爲唐初之冠其文自駢偶諸篇外散體皆疏樸
近古故韓愈柳宗元皆稱之其人則獻媚武后殊不
足道所作大周受命頌及進表請追上太原王帝號
表大崇福觀記諸篇竝載集中至今爲儒者詬厲特
以詞章之美流傳不廢云爾

子昂少以豪俠使氣及冠折節爲學精究墳籍耽愛
黃老易象尤善屬文唐興文章承徐庾餘風天下祖
尙至是始變雅正故雖無風節而唐之名人無不推
之

郡齋讀書志

陳拾遺集十卷黃門侍郎盧藏用爲之序又有別傳

系之卷末子昂爲明堂議神鳳頌納忠貢諛於孽后
之朝大節不足言矣然其詩文在唐初實首起八代
之衰者韓退之薦士詩言國朝盛文章子昂始高蹈
非虛語也盧序亦簡古清壯非唐初文人所及

直齋

書錄解題

蘇頌

字廷碩弱敏悟一覽千言第進士武后封嵩高舉賢
良方正馬載曰古稱一日千里蘇生是已拜中書舍
人時瓌同中書門下三品父子同在禁篋朝廷榮之
元宗平內難書詔填委獨頌在太極後閣口所占授

功狀百緒輕重無所差書史白曰丐公徐之不然手腕脫矣中書令李嶠曰舍人思若湧泉吾所不及襲封許國公同平章事卒年五十八贈右丞相謚文憲帝愛其文曰卿所爲詔令署臣某撰朕當畱中後遂爲故事其後李德裕著論曰近世詔誥惟頌敘事外自爲文章云

唐書

許公集二十卷韓休爲序集本四十六卷今亡其半矣

郡齋讀書志

宋之問

字延清一名少連汾州人甫冠武后召與楊炯分直

習藝館累轉尚方監丞景龍中遷考功員外郎睿宗立以獯險盈惡詔流欽州賜死

唐書

考功集十卷徐堅嘗論之間之文如良金美玉無施不可其爲當時所重如此

那齋讀書志

張九齡

字子壽韶州曲江人七歲知屬文十三以書干廣州刺史王方慶方慶歎曰是必致遠以道侔伊呂科策高第爲左拾遺遷中書舍人封曲江男封始興縣伯卒年六十八諡文獻

唐書

欽定四庫全書簡明目錄曲江集二十卷其書首尾完具

猶唐以來之舊本蓋文淵閣所藏宋槧邱濬錄傳於外也九齡以忠亮負重望而文章高雅亦不減燕許唐書文藝傳載徐堅之言謂其如輕縑素練實濟時用而窮邊幅殆局於風氣以富豔求之歟

柳宗元以九齡兼攻詩文但不能究其極耳集後有姚子彥所撰行狀呂溫撰真贊鄭宗珍撰謚議徐浩撰墓碑及贈司徒勅詞

郡齋讀書志

曲江本有元祐中郡人鄧開序自言得其文於公十世孫蒼梧守唐輔而刊之於末附以中書舍人樊子彥所撰行狀會稽公徐浩所撰神道碑及太常博士

鄭宗珍議諡文獻狀蜀本無之

直齋書錄解題

宋璟

邢州南和人封廣平郡公尚書右丞相卒贈太尉諡

文貞

唐書

李邕

揚州江都人爲汲郡北海太守邕之文於碑頌是所
長人奉金帛請其文前後所受鉅萬計邕雖詘不進
而文名天下時稱李北海杜甫知邕負謗死作八哀
詩讀者傷之

唐書

欽定四庫全書簡明目錄李北海集六卷附錄一卷凡賦

五篇詩四篇雜文三十二篇蓋後人哀輯之本視元集七十卷已十不存一卷末附錄新舊唐書本傳及贈荅詩而別載賀赦表六篇題曰糾謬蓋皆李吉甫作文苑英華誤題邕名彭叔夏文苑英華辨證嘗釐正之故不以入集云

劉知幾

徐州彭城人與兄知柔俱以善文詞知名擢進士第著史通內外四十九篇譏評今古徐堅之歎曰爲史氏者宜置此座右卒年六十一領國史且三十年官雖徒職常如舊歿後帝詔河南就家寫史通讀之稱

善追贈工部尙書諡曰文

唐書

欽定四庫全書簡明目錄史通二十卷劉子元卽劉知幾以字行也其書內篇論史家體例凡三十九篇今佚其三篇外篇述史籍源流與古人得失凡十三篇蓋子元官祕書監時與蕭至忠宗楚客爭論史事發憤而作故其詞往往過激至疑經惑古諸篇更幾於王充之刺孟問孔然子元熟悉史例其所駁詰雖馬班或不能自解故自唐宋以來史家奉若龜鑑焉

新史以爲工訶古人拙於用已然其爲書亦博矣史通者漢封司馬遷後爲史通子而亦兼白虎通之義

也直齋書錄解題

附史通序

嘗欲自班馬已降訖於姚李令狐顏孔諸書莫不因其舊義普加釐革將恐致驚末俗取咎時人徒有其勞而莫之見賞所以每握管歎息遲回者久之必寢而不言嘿而無述又恐沒世之後誰知予者故退而私撰史通以見其志昔漢世劉安著書號曰淮南子其書牢籠天地博極古今上自太公下至商鞅其錯綜經緯自謂兼於數家無遺力矣然自淮南以後作者無絕必商榷而言則其流又衆蓋仲尼旣沒微言

不行史公著書是非多謬由是百家諸子詭說異詞
務爲小辨破彼大道故揚雄法言生焉儒者之書博
而寡要得其糟粕失其菁華而流俗鄙夫貴遠賤近
轉滋牴牾自相欺惑故王充論衡生焉民者冥也冥
然罔知率彼愚蒙牆面而視或訛音鄙句莫究本源
或守株膠柱動多拘忌故應劭風俗通生焉五常異
稟百行殊軌能有兼偏知有長短苟隨才而任使則
片善不遺必求備而後用則舉世莫可故劉劭人物
志生焉夫開國承家立身立事一文一武或出或處
雖賢愚壤隔善惡區分苟時無品藻則理難銓綜故

陸景典語生焉詞人屬文其體非一譬甘辛殊味丹
素異彩後來祖述識味圓通家自詆訶人相掎摭故
劉勰文心生焉若史通之爲書也蓋傷當時載筆之
士其義不純思欲辨其指歸殫其體統夫其書雖以
史爲主而餘波所及上窮王道下揆人倫總括萬殊
包吞千有自法言已降迄於文心而往固以納諸胸
中曾不懣芥者矣

案史通一書所心摹手追者文心雕龍也觀其縱橫
辨博固足竝雄而麗藻適文猶或未逮至知幾自敘
末以子雲草元自況無乃矜詡太過

王維

字摩詰太原祁人九歲知屬辭開元九年進士擢第
天寶末爲給事中祿山陷西都維扈從不及爲賊所
得迫以僞署賊平維以凝碧詩聞於行在肅宗特宥
之謫授太子中允乾元中轉尙書右丞

唐書

王維集十卷代宗訪維文章於弟縉哀集十卷上之
那齋讀書記

建昌本與蜀本次序皆不同大抵蜀刻唐六十家集
多異於他處本而此集編次尤無倫維詩清逸追逼
陶謝輞川別墅圖畫摹傳至今嘗與裴迪同賦各二

十絕句集中又有與迪書略曰夜登華子岡輞水淪
漣與月上下寒山遠火明滅林外深巷寒犬吠聲如
豹村墟夜春復與疎鐘相閒此時獨坐僮僕靜默每
思曩昔攜手賦詩當待春中卉木蔓發輕條出水白
鷗矯翼露溼青臯麥雉朝雉儻能從我遊乎余每讀
之使人有飄然獨往之興迪詩亦佳然他無聞於世
蓋亦高人也輞川在藍田縣西南二十里本宋之間
別圃維後表爲清源寺終墓其西

直齋書錄解題

附王縉進兄維集表

臣縉言中使王承華奉宣進止令臣進叵兄故尙書

右丞維文章恩命忽臨以驚以喜退因編錄又竊感傷臣兄文詞立身行之餘力當官堅正秉操孤直縱居要劇不怠清淨實見時輩許以高流至於晚年彌加進道端坐虛室念茲無生乘興爲文未嘗廢業或散朋友之上或畱篋笥之中臣近搜求尙慮零落詩筆共成十卷今且隨表奉進曲承天鑒下訪遺文魂而有知荷寵光於幽窆歿而不朽成大名於聖朝臣不勝感戴悲歡之至奉表以聞

勅卿之伯氏天下文宗位歷先朝名高希代抗行周雅長揖楚辭調六氣於終篇正五音於逸韻泉飛藻

思雲散襟情詩家者流時論歸美誦於人口久鬱文
房歌以國風宜登樂府視朝之後乙夜將觀石室所
藏歿而不朽柏梁之會今也則亡乃眷棣華克成編
錄聲華益茂歎息良深

案右丞之文高華典貴一如其詩仰承燕公後接柳
州爲一大家

員俶

李泌傳開元十六年悉召能言佛道孔子者相荅難
有員俶者九歲升坐詞辨注射

唐書

張巡

字巡鄧州南陽人博通羣書曉戰陣法氣志高邁開
元末擢進士第出爲清河令調真源令天寶十五載
起兵討賊至睢陽與太守許遠合拜御史中丞巡讀
書不過三復終身不忘爲文章不立藁睢陽陷被害
贈揚州大都督大中時圖巡遠霽雲像於凌煙閣睢
陽至今祠亭號雙廟云

唐書

案睢陽公傳詩數首皆在圍城所作慷慨感激如見
其心四六一二首意奧筆健驅遣神奇雲間寸爪益
信史載非虛

李白

見賦家

案太白諸宴集序雅思騷骨儷而逸者要之詞人無此筆終不免爲積卷所沉沒參觀子安諸序可見工部儷語絕少故當不以此自名耳

蕭穎士

字茂挺四歲屬文十歲補太學生觀書一覽卽誦通百家譜系書攬學開元二十三年舉進士對策第一爲集賢校理宰相李林甫怒其不下已調廣陵參軍事穎士急中不能堪作伐櫻桃樹賦以譏林甫有奴事穎士十年笞楚嚴慘或勸其去荅曰非不能愛其

才耳

唐書

欽定四庫全書簡明目錄蕭茂挺文集一卷穎士文章與
李華齊名然華污偽命而穎士勸源洧拒安祿山致
書崔圓策劉展必叛其氣節識略皆非華所及惟著
作散落唐志所載游梁新集十卷文集十卷者俱不
可見此本僅存賦九篇表五篇牒一篇序五篇書五
篇耳

蕭穎士集十卷閩士和盛推穎士文章以爲閩蕭氏
之風者童子羞稱曹陸

郡齋讀書志

蕭功曹集十卷門人柳并爲序

直齋書錄解題

李華

字遐叔趙州贊皇人累中進士宏辭科大曆初卒初
華作含元殿賦成以示蕭穎士穎士曰景福之上靈
光之下華文辭絳麗少宏傑氣穎士健爽自肆時謂
不及穎士而華自疑過之因著弔古戰場文極思研
推已成汗爲故書雜置梵書之度與穎士讀之稱工
華問今誰可及穎士曰君加精思便能至矣華愕然
而服

唐書

欽定四庫全書簡明目錄李遐叔文集四卷華之文章根
柢不及蕭穎士而詞采煥發則過之晁陳二家書目

皆不錄其集蓋至宋已佚此本乃從文苑英華唐文粹諸書採輯而成故李翱所作盧坦之楊烈婦兩傳亦誤收焉

陸贄

字敬輿蘇州嘉興人卒年五十二贈兵部尚書諡曰

宣

唐書

欽定四庫全書簡目錄翰苑集二十二卷或題陸宣公奏議沿讀書志之誤也贄文多用駢句蓋當日之體裁然真意篤摯反覆曲暢不復見排偶之迹新唐書不收四六獨錄贄文十餘篇司馬光資治通鑑錄其

疏至三十九篇上下千年所取無多於是者經世之
文斯之謂矣

陸贄奏議十二卷贄在奉天日下詔書數百初如不
經思逮成皆周盡人情嘗爲帝言今盜徧天下宜痛
自悔以感人心誠不吝改過以言謝天下使臣持筆
亡所忌庶叛者革心上從之故下制書雖武夫悍卒
無不感動流涕議者謂興元戡難功雖爪牙宜力蓋
贄有助焉舊有榜子集五卷議論集三卷翰苑集十
卷元祐中蘇子瞻乞校正進呈改從今名疑是裒諸

集成此書

郡齋讀書志

附 權德輿敘

嘗讀賈誼書觀其經制人文鋪陳帝業術亦至矣待
之宜室恨得後時遇亦深矣然竟不能達四聰而盡
其善排羣議而試厥謀道之難行亦已久矣東陽絳
灌何代無之嘻一薰一蕕善齊不能同其器方鑿圓
柄良工無以措巧心所以理世少而亂日多大雅衰
而正聲寢漢道未融既失之於賈傅吾唐不幸復擯
棄於陸公公諱贄字敬輿吳郡蘇人漂陽令侃之子
年十八登進士第應博學鴻詞科授鄭縣尉非其好
也省母歸壽春刺史張鑑有名於時一獲晤言大加

賞識暨別鑑以泉貨數萬爲贖曰願以此奉太夫人
一日之膳公悉辭之領新茶一串而已是歲以書判
拔萃調渭南簿御史以監察換之德宗皇帝春宮時
知名召對翰林卽日拜學士由祠部員外轉考功郎
中朱泚之亂從幸奉天時車駕播遷詔書旁午公灑
翰卽成不復起草初若不經思慮及成而奏無不曲
盡事情於機會倉卒填委同職者無不拱手歎服不
能復有所助嘗從容奏曰此時詔書陛下宜痛自引
過以感人心昔禹湯以罪已勃興楚昭以善言復國
陛下誠能不悛改過以言謝天下俾臣草詞無諱庶

幾羣盜革心上從之故行在詔書始下雖武人悍卒無不揮涕激發議者以德宗克平寇亂不惟神武之功爪牙宣力蓋亦資文德腹心之助焉及還京師李抱真來朝奏曰陛下在山南時山東士卒聞書詔之辭無不感泣思奮臣節臣知賊不足平也公自行在帶本職拜諫議大夫中書舍人精敏小心未嘗有過艱難扈從行在輒隨啓沃謀猷特所親信有時讌語不以公卿指名但呼陸九而已初幸梁洋棧道危狹從官前後相失上夜次山館召公不至泣然號於禁旅曰得陸贄者賞千金頃之公至太子親王皆賀初

公既職內署母韋氏尙在吳中上遣中使迎至京師
道路置驛文士榮之內外屬望旦夕俟其輔政爲竇
參忌嫉故緩之貞元八年拜中書郎平章事公以少
年入侍內殿特蒙知遇不可與衆浮沉苟且自愛事
有不可必諍之上察物太精躬臨庶政失其大體動
與公違姦諛從而間之屢至不悅親友或規之公曰
吾上不負天子下不負吾所學不恤其他公精於吏
事斟酌剖決不爽錙銖又云戶部侍郎裴延齡以姦
回得幸害時蠹政物議莫敢指言公獨以身當之屢
言不可翰林學士吳通元忌公先達每竊中傷陰結

延齡互言公短宰相趙憬公之引拔升爲同列以公
排邪守正心復異之羣邪沮謀直道不勝十年退公
爲賓客罷政事明年夏旱芻糧不給軍校訴於上延
齡奏曰此皆陸贄輩怨望鼓扇軍人也貶公忠州別
駕上怒不可測賴陽城張萬福救之獲免公在南賓
閉門却掃郡人稀識其面復避謗不著書惟考校醫
方撰集驗方五十卷行於世江峽十稔永貞初與鄭
餘慶陽城同徵還公已薨歿時年五十二公之秉筆
內署也推古揚今雄文藻思敷之爲文誥伸之爲典
謨俾獯狻向風懦夫增氣則有制誥集二十卷覽公

之作則知公之爲文也潤色之餘論思獻納軍國利害巨細必陳則有奏草七卷覽公之奏則知公之爲臣也其在相位也推賢與能舉直錯枉將幹璿衡而揭日月清氛沴而平泰階敷其道也與伊說爭衡考其文也與典謨接軫則有中書奏議七卷覽公之奏議則知公之事君也

附蘇軾進陸宣公奏議劄子

臣等猥以空疎備員講讀恭惟聖明天縱學問日新臣等才有限而道無窮心欲言而口不逮以此自愧莫知所爲竊謂人臣之納忠辟如醫者之用藥藥雖

進于醫手方多傳于古人若已經效于世間不必皆
從于已出伏見唐宰相陸贄才本王佐學爲帝師論
深切于事情言不離于道德智如子房而文則過辨
如賈誼而術不疎上以格君心之非下以通天下之
志但其不幸仕不遇時德宗以苛刻爲能而贄諫之
以忠厚德宗以猜疑爲術而贄勸之以推誠德宗好
用兵而贄以消兵爲先德宗好聚財而贄以散財爲
急至於用人聽言之法治邊馭將之方罪已以收人
心改過以應天道去小人以除民患惜名器以待有
功如此之類未易悉數可謂進苦口之藥石鍼害身

之膏肓使德宗盡用其言則貞觀可得而復

案古以四六入章奏者有矣賀謝表而外惟薦舉及
進奉則或用之品藻比擬此其長也若敷陳論列無
往不可而又繁組輝華宮商諧協則前無古後無今
宣公一人而已指事如口講手畫說理則縷析條分
旁延景物則興會飛翥遠計邊瑣則武庫森列大抵
義蘊得自六經而文詞則文選爛熟也惟公兼體是
以獨擅

常袞

京兆人天寶末及進士第性狷潔不妄交游由太子

正字累爲中書舍人文采瞻蔚長於應用譽重一時
卒年五十五贈尙書左僕射

唐書

楊炎

字公南鳳翔天興人文藻雄蔚爲中書舍人與常袞
同時知制誥袞長於除書而炎善德音自開元後言
制誥者稱常楊云拜門下侍郎同中書門下平章事

唐書

柳宗元

字子厚其先河東人後徙於吳少精敏絕倫爲文章
卓偉精緻一時輩行推仰第進士博學宏詞科授校

書郎貞元十九年爲監察御史裏行善王叔文章執
誼引內禁近與計事擢禮部員外郎叔文敗貶永州
司馬旣竄斥地又荒癘因自放山澤間其堙厄感鬱
一寓諸文做離騷數十篇讀者咸悲惻元和十年徙
柳州刺史卒年四十七韓愈評其文曰雄深雅健似
司馬子長崔蔡不足多也

唐書

欽定四庫全書簡明目錄詒訓柳先生文集四十五卷外
集二卷新編外集一卷宋韓醇音釋初劉禹錫編宗
元詩文爲三十二卷宋穆修所刊云卽禹錫所編然
已分爲四十五卷沈晦以穆本參校諸本凡穆本所

不載者釐爲外集醇因沈本作音註又別輯逸文一卷目曰新編外集與張敦頤韓柳音義同時竝出而較張書爲差詳

柳宗元集三十卷集外文一卷集中有御史周君碣司馬溫公考異以此碣爲周子諒碣實開元二十五年也柳作天寶時悞案此碣殊疎略舊唐書紀牛仙客傳元宗實錄皆載子諒彈牛仙客杖流瀼州死藍

田郡齋讀書志

柳柳州集四十五卷外集二卷劉禹錫作序言編次其文爲三十二通退之之誌若祭文附第一通之末

今世所行本皆四十五卷又不附誌文非當時本也

或云沈元用所傳穆伯長本

直齋書錄解題

案自有四六以來辭致縱橫風調高騫至徐庾極矣
筆力古勁氣韻沉雄至燕公極矣驅使卷軸詞華絢
爛至四傑極矣意思精密情文婉轉至義山極矣及
宋歐蘇諸公筆勢一變創爲新逸又或一道也惟子
厚晚而肆力古文與昌黎角立起衰垂法萬世推其
少時實以詞章知名詞科起家其鎔鑄烹鍊色色當
行蓋其筆力已具非復雕蟲篆刻家數然則有歐蘇
之筆者必無四傑之才有義山之工者必無燕公之

健浴及兩宋又於徐庾風格去之遠矣獨子厚以古文之筆而鑪鞴於對仗聲偶間天生斯人使駢體古文合爲一家明源流之無二致嗚呼其可及也哉

劉禹錫

字夢得系出中山世爲儒擢進士第登博學宏辭科工文章爲監察御史素善章執諛王叔文頗憑藉其勢叔文敗貶朗州司馬鬱鬱不自聊作問大鈞謫九年等賦數篇久之召還遷太子賓客會昌時加檢校禮部尙書卒年七十二

唐書

欽定四庫全書簡明目錄劉賓客文集三十卷外集十卷

原集四十卷至宋佚其十卷宋敏求蒐得逸詩四百
七首遺文二十二首編爲外集十卷其古文縱橫博
辨於韓柳之外自爲軌轍其詩含蓄不足而精銳有
餘大抵皆與杜牧相伯仲

禹錫少工文章恃才而廢老年寡所合乃以文章自
適早與柳宗元爲文章之友稱劉柳晚與居易爲詩
友號劉白雖詩文似少不及然能抗衡二人閒信天
下之奇才也

郡齋讀書志

權德輿

字載之未冠以文章稱德宗聞其才召爲太常博士

卒年六十贈尙書左僕射諡曰文自始學至老未曾
一日去書不觀其文雅正瞻緜當時公卿侯王功德
卓異者皆所銘紀十常七八雖動止無外飾其醞藉
風流自然可慕貞元元和間爲搢紳羽儀云

唐書

欽定四庫全書簡明目錄權文公集十卷德輿制集文集
各五十卷據王士禎居易錄其所藏尙八十卷然未
見其本世所傳者皆楊慎所收詩賦十卷卽此本也
其詩精鍊不足而有雍容之氣象

權德輿集五卷其兩漢辨亡論世祖封不義侯議世
多稱之云嘗自纂制誥集五十卷楊憑爲序今亡逸

文集孫憲孫編次楊嗣復爲序

郡齋讀書志

權丞相集五十卷德輿父臯以不汙祿山見卓行傳
其子璩爲中書舍人劾李訓傾覆亦能世其家性寬
和有大體文亦純雅宏瞻三世名迹可謂德門矣墓
碑韓昌黎所爲也

直齋書錄解題

獨孤及

字至之河南洛陽人爲兒時讀孝經父試之曰兒志
何語對曰立身行道揚名於後世宗黨奇之天寶末
以道舉高第卒年五十三諡曰憲及性孝友其爲文
彰明善惡長於議論

唐書

欽定四庫全書簡明目錄毘陵集二十卷其門人梁肅編
凡詩三卷文十七卷然其中馬退山茅亭記實柳宗
元作不應誤入及集豈後人又有竄亂歟唐之古文
得元結與及始湔除繁濫故唐實錄有韓愈學及之
說特變格之初明而未融耳王士禎頗相詆謔殆非
篤論

天寶十三年舉洞曉元經科代宗初爲太常博士濠
舒二州刺史政最徙常州卒官自幼有成人之量徧
覽五經觀其大義不爲章句學爲文以立憲誠世裒
賢遇惡爲用長於論議集有李丹梁肅前後序末載

崔祐甫碑誌

郡齋讀書志

子曰郁字古風亦有名韓退之志其墓

直齋書錄解

題

梁肅

梁補闕集二十卷唐右補闕翰林學士安定梁肅敬
之撰崔恭爲之序韓愈言其佐助陸相貢士所興及
第者皆赫然有聞然則梁固名儒善士也

直齋書錄

解題

賈至

字幼鄰擢明經第元宗幸蜀拜起居舍人知制誥帝

傳位至讓冊帝曰昔先天誥命乃父爲之今茲命冊
又爾爲之兩朝盛典出卿家父子手可謂繼美矣大
歷初徙兵部累封信都縣伯進京兆尹七年以右散
騎常侍卒年五十五諡曰文

唐書

賈幼幾集十卷唐起居舍人河南賈至撰唐志二十
卷別十五卷李淑書目云至集有三本又有十卷者
有序今本無序中興館閣本亦同

直齋書錄解題

馮宿

字拱之婺州東陽人父子華廬親墓有靈芝白兔號
孝馮家宿貞元中與弟定從弟審寬竝擢進士第徐

州張建封表掌書記歷工部刑部二侍郎修格後敕
二十篇行於時累封長樂縣公擢東川節度使卒年
七十諡曰懿治命薄葬悉以平生書納墓中

唐書

顧況

蘇州人嘲諷能文人多狎之著作郎貶饒州司戶文

集二十卷

唐書

欽定四庫全書簡明目錄華陽集三卷附顧非熊詩一卷

唐顧況撰況集本三十卷南宋末僅存五卷後亦佚
此本乃其裔孫名端蒐合成帙而以其子非熊詩附
之然文苑英華唐文粹所載尙未全收也皇甫湜稱

自爲況作集序未嘗許人則況在中唐名甚重非熊詩所存無幾其御溝紅葉詩殆好事者爲之存以爲談資爾

況字逋公至德二年江東進士善爲歌詩性詼諧德宗時柳渾輔政以祕書郎召況素善李泌及泌相自謂得達官當久遷著作郎及泌卒有調笑語貶饒州司戶卒集有皇甫冉詩序

郡齋讀書志

穆員

字與直工爲文章杜亞畱守東都署佐其府早卒兄弟四人皆和粹世以珍味目之贊少俗然有格爲醜

質美而多文爲酥員爲醍醐賞爲乳腐有穆公集十

卷許孟容爲序

唐書

于邵

字相門京兆萬年人天寶末第進士拜諫議大夫知

制誥進禮部侍郎朝有大典冊必出其手

唐書

呂溫

字化光河中人以侍御史使吐蕃元和元年還進戶

部員外郎溫藻翰精富一時流輩推尙貶道州刺史

徙衡州治有善狀文集十卷

唐書

貞元十四年進士從梁肅爲文章規摹左氏劉禹錫

爲編次其文序之云古之爲書先立言而後體物賈
生之書首過秦而荀卿亦後其賦故斷自人文化成
論至諸葛武侯廟記爲上篇今集先賦詩後雜文非
禹錫文也

郡齋讀書志

案劉呂皆柳州死友其文筆警逸亦足相羽翼如昌
黎之有籍湜矣

令狐楚

字愨士德棻之裔也生五歲能爲辭章逮冠貢進士
辟太原幕府掌書記召授右拾遺擢職方員外郎知
制誥其爲文於箋奏制令尤善每一篇成人皆傳誦

爲中書侍郎同平章事貶衡州刺史敬宗時拜河南
尹遷宣武節度使入爲戶部吏部尙書俄拜東都
留守天平河東山南西道節度使卒年七十二諡曰文
唐書

楚相憲宗爲文善於牋奏自爲序云登科後爲桂并
四府從事掌牋奏者十三年始遷御史綴其藁得一
百九十三篇自號白雲孺子

郡齋讀書志

案義山章奏之學得自文公蓋具體而微者矣詳觀
文公所作以意爲骨以氣爲用以筆爲馳騁出入殆
脫盡裁對隸事之迹文之深於情者也滔滔壘壘一

往清婉而又非宋時一種空腐之談盡失駢儷真面者所可藉口由其萬卷填胸超然不滯此玉溪生所以畢生服膺欲從末由者也吾於有唐作家集大成者得三家焉於燕公極其厚於柳州致其精於文公仰其高

李德裕

字文饒宰相吉甫子也以蔭補校書郎召拜御史相武宗策功拜太尉進封趙國公裕固讓帝曰吾恨無官酬公毋固辭改衛國公宣宗卽位貶崖州司戶卒年六十三德裕在位雖遽書警奏皆從容裁決所居

安邑里第有院號起草亭曰精思無計大事則處其中後房無聲色娛生平所著多行於世云

唐書

欽定四庫全書簡明目錄會昌一品集二十卷別集十卷外集四卷唐李德裕撰會昌一品集者皆武宗時制誥別集皆賦詩雜文外集皆遷謫以後閒居論史之文卽窮愁志也德裕別有衛公備全集五十卷年譜一卷姑臧集五卷獻替錄辨謫略諸書共十一卷竝見陳氏書錄解題今則已佚矣

德裕自穆宗時已掌內外制累踐方鎮遂相文宗平生著述詎止此其不傳於世者多矣其論精深其詞

峻潔猶可見其英偉之氣周秦行紀一篇奇章怨家
所爲而文饒遂信之爾

直齋書錄解題

白居易

字樂天下邽人擢進士對制策以刑部尙書致仕卒
年七十五居易被遇憲宗事無不言多見聽可爲當
路所忌乃放意詩文頗以規諷得失多至數十篇當
時爭傳雞林行賈售其國相率篇易一金其僞者相
輒能辨之其始生七月能展書姆指之無兩字雖試
百數不差九歲識音律其篤於才章蓋天稟焉敏中

爲相請諡曰文

唐書

欽定四庫全書簡明目錄白氏長慶集七十二卷唐白居易撰居易詩格與元稹同而深厚則過之故張爲主客圖以居易爲廣大教化主稹不與焉其集自宋迄今惟此一本但或題長慶集或題白氏文集其標目行款有所改削耳

樂天進退以義風流高矣與劉禹錫游人謂之劉白而不陷入司馬黨中與元稹游人謂之元白而不蹈北司黨中又與楊虞卿爲姻家而不蹈牛李黨中嗚呼叔世有如斯人之髣髴者乎

郡齋讀書志

白氏長慶集七十一卷年譜一卷又新譜一卷唐白

居易撰集後記稱前著長慶集五十卷元微之爲序
後集二十卷自爲序今又續後集五卷自爲記前後
七十五卷時會昌五年也墓志乃云集前後七十卷
當時預爲誌時未有續後集今本七十一卷蘇本蜀
本編次亦不同蜀本又有外集一卷往往皆非樂天
自記之舊矣

直齋書錄解題

元稹

字微之河南人舉制科對策第一拜左拾遺元和末
膳部員外郎稹尤長於詩與白居易名埒天下傳諷
號元和體妃嬪近習皆誦之宮中呼元才子長慶初

知制誥進同中書門下平章事出爲同州刺史徙浙東觀察使明州歲貢蚶不勝其疲積奏罷之太和三年召爲尙書左丞俄拜武昌節度使卒年五十三所論著甚多

唐書

欽定四庫全書簡明目錄元氏長慶集七十一卷補遺六卷唐元稹撰白居易作稹墓誌稱著文一百卷題曰元氏長慶集至宋已殘缺此本乃宣和中建安劉麟所刊明馬元調據以翻雕凡詩二十六卷賦一卷雜文三十卷較原本已佚十之四而門目亦與元稹自述不同不知何人所重編也

元氏長慶集六十卷唐元稹撰中興書目止四十八卷稹初與白樂天齊名文章相上下出處亦不相悖晚而欲速仕依奄宦得相卒爲小人之歸而居易終始全節嗚呼爲士者可以鑒矣

直齋書錄解題

杜牧

字牧之京兆萬年人第進士歷黃池睦三州刺史復爲湖州知制誥遷中書舍人卒年五十初牧夢人告曰爾應名畢復夢書皎皎白駒字或曰過隙也俄而炊餽裂牧曰不祥也乃自爲墓誌悉取所爲文章焚

之唐書

欽定四庫全書簡明目錄樊川文集二十卷外集一卷別集一卷唐杜牧撰其文集二十卷與唐志合外集一卷與讀書志合惟后邨詩話稱續別集三卷此僅別集一卷而無續集蓋佚之矣牧作李戡墓誌其詆元白之言甚悉

案雲溪友議誤以戡語為牧語今考正

劉克壯獨不謂然

今考牧語治蕩誠不減元白然其風骨則迥勝雜文排冑縱橫亦非元白所及也

樊川集二十卷外集一卷唐杜牧撰牧佐之孫其甥裴延翰編而序之

直齋書錄解題

案樊川才分超迥不可羈勒四六不多亦不拘繩墨

筆意天挺

李商隱

字義山懷州河內人令狐楚帥河陽奇其文使與諸
子游開成二年擢進士第又試拔萃中選王茂元鎮
河陽表掌書記以子妻之得侍御史柳仲郢節度劔
南東川辟判官檢校工部員外郎府罷客滎陽卒商
隱初爲文瑰邁奇古及在令狐楚府楚本工章奏因
授其學商隱自是始爲今體章奏博學強記下筆不
自休尤善爲諫奠之詞時溫庭筠段承式俱用是相
琴號三十六體

唐書

欽定四庫全書簡明目錄李義山文集箋註十卷

國朝徐樹穀箋徐炯註李商隱駢偶之文婉約雅飭於唐人爲別格所自編樊南甲乙集久已散佚朱鶴齡始蒐輯殘剩編爲五卷而闕其狀之一體炯又爲補輯定爲此本併爲之註樹穀又考證史籍各箋其本事於題下多所辨訂

樊南甲集二十卷乙集二十卷又文集八卷義山初爲文瑰邁奇古及從楚學儷偶長短而繁縟過之旨能感人人謂其橫絕前後無儔者今樊南甲乙集皆四六自爲序卽所謂繁縟者又有古賦及文共三卷

辭旨怪詭宋景文序傳中云譎怪則李商隱蓋以此
郡齋讀書志

甲乙集者皆表章啟牒四六之文既不得志於時歷
佐藩府自茂元亞之外又依盧宏正柳仲郢故其所
作應用若此之多然以近世四六觀之當時以爲工
今未見其工也

直齋書錄解題

案柳子厚少習詞科工爲箋奏及竄永州肆力古文
爲深博無涯涘一變而成大家李玉溪少能古文不
喜聲偶及事令狐授以章奏一變而爲今體卒以四
六名家此二家者從入各有自而始終成就相反如

此所謂學焉得其所近者何以稱焉蓋子厚得昌黎
遙爲應和而玉溪惟合狐爲之親炙其遇合遭際自
是不同要之天資學力固大有逕庭矣徐庾以來聲
偶未備王楊之作才力太肆沿及五代不免靡弱宋
代作者不無疎拙惟樊南甲乙則今體之金繩章奏
之玉律也循諷終篇其聲切無一字之贅屈其拙對
無一語之偏枯才歛而不肆體超而不空學者舍是
何從入乎直齋顧謂當時稱其工今不見其工此華
篋十重而觀者胡盧掩口於燕石者也蓋南宋文體
習爲長聯崇尙侈博而意趣都盡浪填事實以爲著

題而神韻浸失所由以不工爲工而四六至此爲不可復振也噫

溫庭筠

本名岐字飛卿少敏悟工爲詞章與李商隱皆有名號溫李薄於行授方山尉廢卒

唐書

符載

集十四卷載字厚之岐襄人幼有宏達之志隱居廬山聚書萬卷不爲章句學元和中卒段文昌爲墓志附於後集皆雜文末篇有數詩而已集前有崔郡王湘送符處士歸觀序皆云載蜀人以比司馬王揚云

直齋書錄解題卷三十一
三十一
郡齋讀書志

薛逢

四六集一卷唐祕書監河東薛逢陶臣撰

直齋書錄

解題

王棨

欽定四庫全書簡明目錄麟角集一卷唐王棨撰皆其場
屋程試之文原本凡賦四十二篇其八代孫蘋又補
采省題詩二十一篇附於後其曰麟角者取顏氏家
訓學如牛毛成如麟角之語以登科比登山也

徐寅

欽定四庫全書簡明目錄徐正字詩賦二卷唐徐寅撰其
集唐志不著錄此本蓋其後人蒐輯而成其賦刻意
鍛鍊時有秀句

鄭畋

集五卷鄭畋台文滎陽人會昌二年進士書判入等
授校書郎乾符四年同中書門下平章事二年召復
秉政病不拜終太子少保藁草皆乾符堂判勅語云
郡齋讀書志

韋莊

字端已杜陵人見素之後踈曠不拘小節依王建爲

偽平章事郝天挺云昭宗乾寧元年進士有浣花集

行世 全唐詩話

錢珣

字瑞文善文辭宰相王搏薦知制誥搏得罪珣貶撫

州司馬 唐書

案韻語陽秋云起之諸孫

韓偓

字致光京兆萬年人擢進士第佐河中幕兵部侍郎

進承旨忤朱全忠貶濮州司馬依王審知而卒 唐書

羅隱

字昭諫新登縣人也十上不中第從事湖南不得意
乃歸及來見王因加殊遇累官諫議大夫給事賜金
紫卒年七十七

吳越備史

欽定四庫全書簡明目錄羅昭諫集八卷原本散佚僅存
甲乙集四卷此本乃康熙中張瓚所輯以其詩文雜
著合爲一編蓋掇拾而成也文苑英華尚有隱秋雲
似羅賦一篇此本不載則所收尚未備矣其詩諷刺
鑿刻時或不留餘地而大旨不乖於忠孝雜文亦無
五代齷齪之態

甲乙集十卷讒書五卷昭諫歸錢鏐梁祖以諫議大

夫召不行魏博羅紹威推爲叔父表薦給事中卒隱
少聰明作詩著文以譏刺爲主自號江東生其集皆
自爲序

郡齋讀書志

吳越掌記集一卷隱掌錢鏐記室所著表啟也

文獻

通考

顧雲

字垂象池州人虞部郎中所著有顧氏編遺十卷茗
川總裁十卷纂新文苑十卷啟事一卷賦二卷集遺
具錄十卷通考云鳳策聯華三卷陳氏云多以擬古
爲題蓋行卷之文也雲咸通十五年進士

藝文志

田霖

四六集一卷南唐田霖撰

直齋書錄解題

謝廷浩

廷浩閩人也頗以辭賦著名與徐夤不相上下時號

錦繡堆

撫言

四六叢話卷三十二

畢